

**BROJ: 0602-1502-16/26****SARAJEVO: 23.07.2026. god.**

Na osnovu člana 69. stav (2) tačka d) i člana 70. st. (1) i (4) Zakona o javnim nabavkama („Službeni glasnik BiH“, br. 39/14, 59/22 i 50/24), te čl. 43. i 47. Statuta KJKP „POKOP“ d.o.o. Sarajevo, direktor donosi.

ODLUKU

o poništenju postupka javne nabavke
po Konkurentskom zahtjevu
Nabavka usluga arhiviranja dokumenata

Član 1.

Poništava se postupak javne nabavke proveden putem konkurentskog zahtjeva za dostavljanje ponuda za nabavku usluga arhiviranja dokumenata, objavljen na Portalu javnih nabavki pod brojem obavještenja 775-7-2-61-3-73/26 od 25.06.2026. godine i u „Službenom glasniku BiH“, broj 46/26 od 03.07.2026. godine, na osnovu člana 69. stav (2) tačka d) Zakona o javnim nabavkama Bosne i Hercegovine („Službeni glasnik BiH“, br. 39/14, 59/22 i 50/24), iz razloga što nijedna od primljenih ponuda nije prihvatljiva.

Član 2.

Ponude ponuđača Mikrografija d.o.o. Sarajevo i CloudIT d.o.o. Sarajevo odbacuju se kao neprihvatljive, u skladu sa članom 66. Zakona o javnim nabavkama Bosne i Hercegovine („Službeni glasnik BiH“, br. 39/14, 59/22 i 50/24), jer ponuđači nisu dostavili prihvatljivo obrazloženje neprirодно niske cijene.

Član 3.

U skladu sa članom 70. stav (6) Zakona o javnim nabavkama Bosne i Hercegovine, KJKP „POKOP“ d.o.o. Sarajevo će ovu odluku objaviti na svojoj internet stranici istovremeno sa njenim dostavljanjem ponuđačima koji su učestvovali u postupku javne nabavke.

Obrazloženje

KJKP POKOP d.o.o. Sarajevo je u skladu sa čl. 88. Zakona o javnim nabavkama BiH („Službeni glasnik BiH“ br. 39/14, 59/22 i 50/24), pokrenuo konkurentski zahtjev za dostavljanje ponuda za nabavku usluga arhiviranja dokumenata.

Obavještenje o nabavci objavljeno je na Portalu javnih nabavki pod brojem 775-7-2-61-3-73/26 od 25.06.2026. godine i u „Službenom glasniku BiH“, broj 46/26 od 03.07.2026. godine.

Kriterij za dodjelu ugovora je najniža cijena.

Na osnovu Obavještenja o nabavci i tenderske dokumentacije, izvršeno je javno otvaranje ponuda dana 10.07.2026. godine u 10:30 sati u prostorijama KJKP POKOP d.o.o. Mula Mustafe Bašeskije 38, Sarajevo, što je konstatovano u zapisniku sa otvaranja ponuda u skladu sa Zakonom o javnim nabavkama („Službeni glasnik BiH“ broj 39/14, 59/22 i 50/24).



Komisija je na javnom otvaranju konstatovala da je svoje ponude predalo 2 (dva) ponuđača i to: Mikrografija d.o.o. Sarajevo, Put Famosa 38, Sarajevo i CloudIT d.o.o. Sarajevo, Industrijska zona Luka bb, Ilijaš.

Komisija je, u skladu sa članom 65. Zakona o javnim nabavkama Bosne i Hercegovine, pristupila pregledu i ocjeni ponuda, koji je sastavni dio ove Odluke.

Obzirom da je tenderskom dokumentacijom predviđena e-Aukcija, ista je zakazana 15.07.2025. godine u 10:00 sati i uspješno je završena.

Nakon dostavljanja izvještaja o toku e-Aukcije sa Portala javnih nabavki, Komisija je utvrdila da je došlo do promjene cijene kod ponuđača u odnosu na dostavljanu ponudu, za postupak javne nabavke usluga arhiviranja dokumenata i sačinila rang listu kako slijedi:

Redni broj	Naziv ponuđača	Cijena ponude nakon provedene e-aukcije bez uključenog PDV-a KM
1.	Mikrografija d.o.o. Sarajevo, Put Famosa 38, Sarajevo	0,01
2.	CloudIT d.o.o. Sarajevo, Industrijska zona Luka bb, Ilijaš	0,10

Komisija ugovornog organa je utvrdila da je ukupna cijena ponude ponuđača Mikrografija d.o.o. Sarajevo, broj: 0602-1502-8/26 od 10.07.2026. godine, za 90% niža u odnosu na cijenu preostale prihvatljive ponude. Slijedom navedenog, u skladu sa članom 66. stav (1) Zakona o javnim nabavkama („Službeni glasnik BiH“, broj: 39/14, 59/22 i 50/24), a u vezi sa članom 17. stav (7) tačka b) Uputstva za pripremu modela tenderske dokumentacije i ponuda („Službeni glasnik BiH“, broj: 90/14 i 20/15), ispunjeni su uslovi za obavezno traženje pojašnjenja neprirodno niske cijene, budući da je cijena ponude za više od 20% niža od cijene drugorangirane prihvatljive ponude.

Postupajući u skladu sa navedenim zakonskim odredbama, ugovorni organ je aktom broj 0602-1502-12/26 od 16.07.2026. godine zatražio od ponuđača dostavljanje detaljnog pojašnjenja sastavnih elemenata ponuđene cijene, uz rok za dostavljanje pojašnjenja do 20.07.2026. godine do 11:00 sati.

Komisija je utvrdila da je ponuđač Mikrografija d.o.o. Sarajevo dostavio pojašnjenje 20.07.2026. godine u 11:45 sati, odnosno 45 minuta nakon isteka roka određenog zahtjevom ugovornog organa.

Neovisno od činjenice da je pojašnjenje dostavljeno nakon isteka ostavljenog roka, Komisija je razmotrila sadržaj dostavljenog obrazloženja te utvrdila da isto nije prihvatljivo, jer ponuđač nije dostavio obrazloženje sastavnih elemenata ponuđene cijene niti je dostavio dokaze koji bi opravdali ponuđenu cijenu u smislu člana 66. stav (2) Zakona o javnim nabavkama Bosne i Hercegovine.

Naime, ponuđač je u svom izjašnjenju naveo da je ponuđena cijena rezultat elektronske aukcije, da raspolaže vlastitim arhivskim depoima, opremom, voznim parkom i stručnim kadrom, te da predmetne usluge obavlja dugi niz godina za veliki broj javnih i privatnih korisnika. Međutim, navedeni navodi predstavljaju isključivo općenite tvrdnje koje nisu potkrijepljene konkretnim podacima, finansijskim pokazateljima niti drugim dokazima koji bi omogućili ugovornom organu da utvrdi opravdanost ponuđene cijene.

Ponuđač nije dostavio analizu strukture ponuđene cijene, kalkulaciju troškova izvršenja ugovora, podatke o troškovima rada, materijalnim i režijskim troškovima, troškovima transporta, korištenja arhivskog prostora, opreme ili druge relevantne elemente cijene, niti je obrazložio na koji način će predmetnu uslugu izvršiti po ponuđenoj cijeni bez ugrožavanja kvaliteta, obima i rokova izvršenja ugovora.

Komisija posebno ističe da činjenica da je konačna cijena formirana u postupku elektronske aukcije sama po sebi ne predstavlja obrazloženje neprirodno niske cijene u smislu člana 66. Zakona o javnim nabavkama BiH, niti oslobađa ponuđača obaveze da, na zahtjev ugovornog organa, dostavi detaljno, argumentovano i dokazivo obrazloženje sastavnih elemenata ponuđene cijene.

Imajući u vidu da je ponuđač pojašnjenje dostavio nakon isteka roka određenog zahtjevom ugovornog organa, te da dostavljeno obrazloženje ni sadržajno ne sadrži relevantne činjenice, kalkulacije i dokaze na osnovu kojih bi se mogla utvrditi realnost i ekonomska opravdanost ponuđene cijene, Komisija je, slijedom navedenog, ocijenila da ponuđač nije dostavio prihvatljivo obrazloženje neprirodno niske cijene, zbog čega se njegova ponuda odbacuje u skladu sa članom 66. Zakona o javnim nabavkama Bosne i Hercegovine.

Komisija ugovornog organa je nakon provedene e-aukcije i konačnog rangiranja ponuda utvrdila da je ponuđač CloudIT d.o.o. Sarajevo dostavio konačnu ukupnu cijenu ponude u iznosu od 0,10 KM, dok je početna ukupna cijena ponude iznosila 29.860,00 KM, što predstavlja značajno umanjenje ponuđene cijene.

Imajući u vidu navedeno, a radi utvrđivanja da li ponuđena cijena omogućava uredno, kvalitetno i potpuno izvršenje ugovora u skladu sa zahtjevima tenderske dokumentacije, ugovorni organ je, u skladu sa članom 66. stav (1) Zakona o javnim nabavkama („Službeni glasnik BiH“, broj 39/14, 59/22 i 50/24), od ponuđača CloudIT d.o.o. Sarajevo zatražio dostavljanje pojašnjenja ponuđene cijene.

Ponuđač CloudIT d.o.o. Sarajevo je u ostavljenom roku dostavio traženo pojašnjenje.

Komisija je izvršila pregled dostavljenog pojašnjenja i ocijenila da isto nije prihvatljivo, jer ponuđač nije dostavio konkretno i dokazivo obrazloženje sastavnih elemenata ponuđene cijene, niti je dokazima potvrdio mogućnost izvršenja predmetnog ugovora po konačno ponuđenoj cijeni od 0,10 KM, u skladu sa članom 66. stav (2) Zakona o javnim nabavkama BiH.

U dostavljenom pojašnjenju ponuđač navodi da je ponuđena cijena rezultat poslovne i strateške odluke donesene tokom elektronske aukcije, s ciljem uspostavljanja dugoročne poslovne saradnje sa ugovornim organom, te da raspolaže odgovarajućim tehničkim, kadrovskim i finansijskim kapacitetima, zbog čega je spreman dio troškova izvršenja ugovora preuzeti na teret vlastitog poslovanja.

Međutim, navedeni navodi predstavljaju općenite tvrdnje koje nisu potkrijepljene konkretnim podacima i dokazima iz kojih bi se mogla utvrditi ekonomska opravdanost ponuđene cijene. Ponuđač nije dostavio strukturu ponuđene cijene, kalkulaciju troškova, niti specifikaciju stvarnih troškova izvršenja ugovora (troškovi rada, transporta, arhivskog prostora, opreme, materijala, režijski troškovi i drugi relevantni troškovi), na osnovu kojih bi ugovorni organ mogao utvrditi način izvršenja predmetne usluge po cijeni od 0,10 KM.

Također, ponuđač nije dostavio finansijske pokazatelje, poslovne analize ili druge relevantne dokaze kojima bi potvrdio navod da će dio troškova izvršenja ugovora snositi iz vlastitih sredstava, niti je obrazložio visinu stvarnih troškova izvršenja ugovora i način njihovog pokrića.

Dostavljeno pojašnjenje ne sadrži konkretne činjenice, kalkulacije i dokaze kojima bi se mogla utvrditi ekonomska opravdanost ponuđene cijene u smislu člana 66. stav (2) Zakona o javnim nabavkama BiH. Ponuđač je bio obavezan dostaviti jasno, detaljno i dokazivo obrazloženje sastavnih elemenata ponuđene cijene, što u konkretnom slučaju nije učinjeno.

Imajući u vidu da dostavljeno pojašnjenje ne sadrži relevantne činjenice, kalkulacije niti dokaze na osnovu kojih bi se mogla utvrditi realnost i opravdanost ponuđene cijene od 0,10 KM, Komisija je ocijenila da ponuđač CloudIT d.o.o. Sarajevo nije dao prihvatljivo obrazloženje neprirodno niske cijene.

Shodno navedenom, ponuda ponuđača CloudIT d.o.o. Sarajevo se odbacuje kao neprihvatljiva, u skladu sa članom 66. Zakona o javnim nabavkama Bosne i Hercegovine („Službeni glasnik BiH“, broj 39/14, 59/22 i 50/24).

Slijedom navedenog, kako nijedna od primljenih ponuda nije prihvatljiva, ispunjeni su uslovi iz člana 69. stav (2) tačka d) Zakona o javnim nabavkama Bosne i Hercegovine za poništenje predmetnog postupka javne nabavke, zbog čega je odlučeno kao u članu 1. ove odluke.

Pouka o pravnom lijeku:

Protiv ove Odluke može se izjaviti žalba Uredu za razmatranje žalbi putem ugovornog organa, najkasnije u roku od 5 (pet) dana od dana prijama ove odluke.

DOSTAVITI:

1. Svim ponuđačima u postupku;
2. Nadležnoj službi;
3. a/a

Sačinila:

Kontrolu izvršio: Izvršni

DIREKTOR

OPĆINSKI UREDA
SARAJEVO